

Zuekuafts-Bepi

Schnitzelbank 1929

1. Dert usse uf dr Solitude
Wachse prächtigi Rosestude.
's isch Jederma dervo erbaut g'si;
Doch am-e-ne Morge sind si klaut g'si!
Der **Nazi-Nachtigalle-Maagli**
Dä fühl sich jetz rächt unbihagli,
Denn „**Solitide-Rosedieb**“ isch
E Namme, wo-n-em gar nit lieb isch.
2. **Zmagge-Grax** und **Ehrab-Schnyder**
Händ vor kurzer Zit scho wider
Kreftig sich am Wickel gno
Und sind vor dr Kadi ko.
Putzt het kain vo däne zwai;
Der **Bummi** nur blächt drissig Schtai.
Doch 's Hundscummusch het sich denn scho
Dr **Cammille** gleischtet! Sowieso!
3. Zuer Hauptprob vom Reformerfescht
Sind d'Baslerkinder ko as Gescht.
Si hebe ufgiehrd sich abscheili,
(Lut Muschtermässdiräcter Meili)
Fir die kapute Stiehl und Bänggli
Kunnt d'Rächnig: rund 800 Fränggli!
Das finde-mer doch e bizzli dick!
(Isch ächtscht dr Meili Katholik?)
4. Im Kaufma-Dichter **Stinckelberger**
Däm schwillt der Kamm jetz als wie ärger.
D'Reformation und's Feschtspiel händ
Däm Ma e Loch in's Hirni brennt.
Zuem Kaiser Willi reist-er au,
Macht mit der Feschtschrift dert Kotau;
Er het-Em 70 Stigg aghänggt
Und kriegt erscht no-n-e-n Orde gschänggt.
5. Dr Gent goht jetze mit sim Maiti
In's **Familiebad** uf d'Braiti.
Me bruucht sich dert jo nit z'geniere,
Het au kai Razzia z'riskiere.
Im Wasser g'sesch zwor numme Gumsle
Und Kinder ummenander fumsle.
's Jungbluet goht nit in's Wasser ine,
Das bockt*) vergniegt in de Kabine.
*) Druckfehler: soll heissen hockt.
6. D'Kinschtlerbihni, „s Atelier“
Das exischiert scho nimmemeh.
Nur dreimol het das Fiirli pifft
Derno het's d'Kinschtlerbihni ??? glipt.
Kai Bai isch sälle Schund go lose.
Hirnschwund, **Artariasklerose**
Mit **Bolopornographica**,
Do mues jo ein verregge dra!
7. Um nit no viel mehr Gäld z'verliere,
Het's **Tagblatt** miesse fusioniere.
Dr **Witziger** mues ums Verregge
Im **Baslerstab** am A go läcke!
Erscht kirzlig isch's em ändlig glunge
Dä Gschmack z'vertrybe uf der Zunge.
D'**Publicitas**, die het en gno.
Kai Mensch walss egedlig rächt wieso?
8. Im **Wittli-Bar** isch ebbis glaffe!
Me het nit numme danzt und gsoffe;
Hauptsächlig het-me Nacht fir Nacht
Dert au „in Sache gmacht“.
Doch sit d'„**Filiale**“ nimme do isch
Die gueti Kundschaft nimme ko isch.
Die Schweinerei die heert jetzt uff.
Denn **Pleite** gmacht het's Wittli — B . . . ar!



„Besucht den Schluss-Abend aller
Comité-Schnitzelbänke Sonntag, den 24.
Februar, abends 7 Uhr, im Musiksaal.“